



## Publicaziuns dalla vischnaunca, jamna 09

### Votaziun cantunala diils 12 da mars 2023

L'urna principala en casa communal ei aviarta sco suonda:  
**Dumengia, 12-3-2023, 9.00–11.00**

La documentaziun da votar duess mintga votant(a) haver obteniu. Cass cuntrari san ins s'annunziar immediatamein, denton **sil pli tard entochen venderdis, ils 10 da mars 2023, allas 14.00**, tier l'administraziun communal (tel. 081 920 36 36).

#### Levgiament da votar

Mintga votant(a) ha la pussevliadad da dar giu sia vusch a scret. En gliez mument sto el/ella observar il suandont:

1. Emplenir ora ils cedels da votar a maun e metter quels en la cuviarta da votar grischa e **serrar giu** ella.
2. Metter la cuviarta da votar grischa ensemen cun il certificat dil dretg da votar **suttascret** en la cuviarta alva, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communal saveis Vus tarmetter cun posta (basegna negina francatura) ni directamein fierer en la scaffa da brevs dalla casa communal.

Ils cedels da votar ston esser sil pli tard la dumengia, ils 12 da mars 2023 allas 11.00 tier l'administraziun communal.

**Aschinavon ch'ei vegn buca risguardau sura instrucziuns da votar, ein ils cedels da votar nunvaleivels.**

Suprastonza communal

---

### Damondas da baghegiar

#### 2023-1028.000

##### Datum dalla publicaziun: 3 da mars 2023

Il patron: ipz ingenieure + planer ag, Via Lucmagn 7, 7180 Disentis/Mustér  
Il representant: ipz ingenieure + planer ag, Via Lucmagn 7, 7180 Disentis/Mustér  
Intenziun: Midada da diever, novas localitads da biro, nova entrada cun in tetg egl edifeci nr. 724, novas inscripziuns  
Edifeci nr. 724  
Parcella: 852  
Adressa: Via Sursilvana 11, 7180 Disentis/Mustér  
Zona: – Zona da habitar mischedada 3  
Zona da prighel: Negina

#### Protestas:

Ils plans da construcziun ein deponi tier l'administraziun communal. L'investa publica cuoza 20 dis dapi il datum dalla publicaziun. Eventualas protestas encunter sura damonda da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Disentis/Mustér, ils 3 da mars 2023

Uffeci da baghegiar Disentis/Mustér

---



---

### Lubientschas da baghegiar

L'istanza da baghegiar ha concediu suandontas lubientschas da baghegiar:

**Nr. 2019-1034.000**

Oskar Degonda-Cantieni, Via Fontauna 2, 7180 Disentis/Mustér; lavurs da sanaziun internas e midada d'intent da surfatschas da biro e scolaziun en ina habitaziun primara, parcella 871, Via Sursilvana 18a, 7180 Disentis/Mustér.

**Nr. 2021-1043.001**

Josef Anton e Simona Simonet-Vescovi, Via Lucmagn 8, 7180 Disentis/Mustér; prolungaziun dalla lubientscha da baghegiar 2021-1043.000 dils 11 d'october 2021: construcziun d'ina casa d'ina famiglia cun garascha integrada, parcella 1219, Gassa da Cuoz 17, 7186 Segnas.

**Nr. 2022-1047.001**

Edgar Durschei-Keller, Via Ansauna 2, 7186 Segnas; adattaziun dil project: niev indrez fotovoltaic vid la fatschada digl edificci nr. 388, parcella 53, Via Sut Vitg 9, 7186 Segnas.

**Nr. 2023-1005.000**

STWEG Parz. 1747, Faltscharidas, Seelmatten 819A, 8488 Turbenthal; niev cundrez fotovoltaic sin tetg, parcella 1747, Via Faltscharidas 6, 7180 Disentis/Mustér.

**Nr. 2023-1006.000**

Baseli Jacomet, Via Crestas 28, 7183 Mumpé Medel; sanaziun parziala dallas fatschadas e sanaziun dil tetg cun cuvrida fotovoltaica, parcella 2172, Via Crestas 28, 7183 Mumpé Medel.

**Nr. 2023-1010.000**

Andriu Maissen ed André Odermatt, Nordstrasse 193, 8037 Turitg; sanaziun dalla mesadad digl edificci nr. 401, nova annexa pil niev scaldament cun ina pumpa da calira d'aria, parcella 1154, Via Peisel 23, 7186 Segnas.

Disentis/Mustér, ils 3 da mars 2023

Uffeci da baghegiar Disentis/Mustér

---

### Annunzia da baghegiar

All'istanza da baghegiar ei sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziau il suandont project:

**Nr. 2023-2015.000**

Marco & Eva-Katharina Tomaschett, Via Plaun Sut 15, 7180 Disentis/Mustér; lavurs da manteniment vid igl access dalla tegia da mises a Run Foppa Su, parcella 2911, Via Lumpegna 2, 7180 Disentis/Mustér.

Disentis/Mustér, ils 3 da mars 2023

Uffeci da baghegiar Disentis/Mustér

---



## Vias d'uaul e vias da cultivaziun

### Informaziun ed annunziass

Igl 1. da fevrer 2023 ei la lescha pil manteniment ed il diever dallas ovras da meglieraziun e d'uaul entrada en vigur legala. Art. 13 dalla lescha definescha il dretg da carrar sin las vias da cultivaziun ed uaul sco suonda:

- a) Tuts viadis da survetsch dalla polizia, dil survetsch forestal, per diever agricol (maschinas agricolas senz'autos cun numera verda), dalla polizia da catscha e pesca, dalla sanitad, dils pumpiers, dils guardians d'ieli e da chemia, viadis per ademplir activitads officialas u legalas sco era viadis en survetsch dalla vischnaunca, dil Cantun e dalla Confederaziun;
- b) viadis cun maschinas agricolas e mieds da transport forestals da tut gener cugl intent da cultivar alps, pastiras e praus (agricultura) ed ils uauls (forestal), sche quels viadis stattan en connex cun la cultivaziun;
- c) viadis en connex cul transport da selvaschinas da grefla sittadas;
- d) pil transport da lenna duront in temps limitau, fixaus en curvegientscha cul selvicultur communal.

Art. 14 dalla lescha communal regla las excepziuns pusseivlas per lubientschas da carrar per vehichels entochen 3.5 t.

#### 1. Lubientschas en general

<sup>1</sup>Las lubientschas da carrar vegnan per regla concedidas mintgamai pil temps naven digl 1. d'avrel entochen ils 15 da december. Aschinavon ch'ei croda neiv ordeifer quei temps ni en cass dad auters eveniments dalla natira, exista negin dretg da far valer la rumida dalla via.

#### 2. Lubientschas annualas

<sup>1</sup>L'administraziun communal conceda sin damonda lubientschas annualas da carrar per suandont diever:

- a) per vehichels da proprietaris da schischom e beins immobiliars sco era affittaders da tals, vegn concediu maximalmein duas lubientschas annualas pil sector pertuccau;
- b) per vehichels – da beins agricols ch'ei registrai cun ina numera da menaschi el register agricol official – vegn concediu duas lubientschas per tuts secturs che vegnan cultivai entras quei menaschi;
- c) per vehichels da personas che segidan cun cultivaders da beins agricols registrai cun numera da menaschi el register agricol official en connex cun la cultivaziun dil terren. Per menaschi vegn concediu maximalmein ina ulteriura lubientscha da gidonter analog alineia b. La damonda sto vegnir inoltrada entras il menaschi puril;
- d) per scadina lubientscha eis ei da pagar la taxa indicada en questa lescha. Per lubientscha sa vegnir registrau duas numeras da vehichel. Las lubientschas ein buca transmissiblas.

#### 3. Lubientschas dil di e dall'jamna

<sup>1</sup>L'administraziun communal conceda sin damonda lubientschas da carrar dil di e dall'jamna per suandont diever:

- a) access per intents defini sco visetas a pasturs, visetas da camonas, per la raccolta e diever da tegias per intent da vacanzas;
- b) vehichels per guides da muntogna;
- c) vehichels per personas cun impediments corporals;
- d) vehichels per la construcziun da baghetgs e stabiliments;
- e) viadis cun vehichels dil cultivader, aschinavon ch'els vegnan utilisai per intents agricols;
- f) viadis cun caschun dad occurrenz.

<sup>2</sup>La lubientscha dil di vala mo pil datum ed il sector indicau e per ir e turnar. La lubientscha jamnila vala per l'jamna ed il sector indicau. Las lubientschas dil di e dall'jamna san vegnir retratgas sin via electronica. Per quei intent ei la vischnaunca vidlunder d'activar sigl 1. d'avrel 2023 ensemen cun l'interpresa „Digitalparking» ina App che facilitescha la retratga dallas lubientschas da carrar.



Sefundond sin las prescripziuns digl art. 14 cefra 2 dalla lescha communal vegnan proprietaris da terren e da schischom, affittaders da tal e cultivaders da beins agricols che giavischan ina lubientscha annuala envidai d'inoltrar la damonda per retrer las lubientschas annualas da carrar all'administraziun communal. Per quei intent ei vegniu creau in formular cun las indicaziuns necessarias per retrer ina lubientscha annuala da carrar. Personas officialas ein medemamein envidadas d'inoltrar ina damonda da carrar. Las lubientschas succedan sin via digitala tenor las indicaziuns sil formular d'annunzia. Leu nua che las indicaziuns mauncan sa buca vegnir concediu ina lubientscha. Il formular d'annunzia anfleis Vus sin la pagina d'internet [www.disentis.ch/vischnaunca/administraziun/partiziuns/administraziun/Lubientscha](http://www.disentis.ch/vischnaunca/administraziun/partiziuns/administraziun/Lubientscha) da carrar. Il formular sa era vegnir retratgs dall'administraziun communal.

Disentis/Mustér, ils 17 da fevrer 2023

Suprastonza communal Disentis/Mustér

---

### **Clom d'urgenza 118**

Preziadas vischinas, preziai vischins

S'imaginei ch'ei brischa e negin vegn! Adina puspei caschunan fiugs gronds donns, gie mettan schizun en prighel la veta da personas – savens perquei ch'ils pumpiers vegnan buca clamai ni memia tard. Biars tratgan: zatgi ha bein alarmau, mo adina puspei ei quei buc il cass, era tier nus el Grischun.

Perquei vala: Tier ina situaziun nua ch'ils pumpiers vegnan duvrai, ei da telefonar immediat al clom d'urgenza 118. Mo aschia eis ei garantiu ch'agid professional arriva il pli spert pusseivel sil plaz.

Engraziel per Vies sustegn!

Vos Pumpiers Sursassiala

---

### **Ludoteca Disentis/Mustér e contuorn**

**Radunonza generala mesjamna, ils 15-3-2023** allas 19.00 ella ludoteca.

#### **Tractandas:**

1. Beinvegni
  2. Elecziun d'in dumbravuschs
  3. Protocol dalla radunonza generala dils 31-3-2022
  4. Rapport dil president
  5. Rendaquen
    - rapport dalla cassiera
    - rapport dils revisurs da quen
  6. Elecziuns:
    - cassier/a
    - actuar/a
  7. Informaziuns, team, plan da lavur
  8. Di naziunal da giugs ils 3-6-2023
  9. Varia
- 

### **Péz Ault Disentis/Mustér**

#### **Trofea Péz Ault Vertical**

**Sonda, 18 da mars 2023, 17.00:** Trofea Péz Ault Vertical  
Dapli informaziuns sut: [www.trofea.ch](http://www.trofea.ch)

**Dumengia, 19 da mars 2023, 17.00:** Trofea Péz Ault Vertical

Dapli informaziuns sut: [www.trofea.ch](http://www.trofea.ch)

---



---

### Secziun da catschadurs Péz Alpetta

#### Preavis Lotto

Sonda, ils 6-5-2023 meina la Secziun da catschadurs Péz Alpetta atras igl usitau lotto ella Sala Fontauna a Mustér. Nus suplichein autras uniuns da risguardar quei datum.

Bien engraziament

la suprastonza

---

### Invitaziun Seniors-Ca

**Gievgia, ils 9 da mars 2023** allas 14.00 lotto el hotel Alpsu. Pusseivladad da gentar allas 12.15 el hotel Alpsu cun 1 menu dil di ed 1 caffè per prezi favoreivel. Annunzia pil gentar tochen **mesjamna, ils 7 da mars 2023** allas 12.00 a Puntreis sut 081 929 56 56.

#### Preavis

**Gievgia, ils 23 da mars 2023** allas 13.45 en Puntreis sentupada cul poet e historiograf Arnold Spescha.

Cordial beinvegni

Team Seniors-Ca

---

### Uniun samaritana Mustér

#### Cuors: Agid d'urgenza tier affons pigns (Notfälle bei Kleinkindern)

**Sonda, ils 18 da mars 2023**, las 8.30–12.00 e las 13.00–16.30 en casa da scola, Mustér. Il cuors sedrezza a mummas e babs, tattas e tats ed a tut las persunas che han da far cun affons pigns ed era pli gronds. Ulteriur sclariment ed annunzias entochen ils **8 da mars 2023** tier: Martina Giger, 079 299 36 13, [martina.casanova@gmx.ch](mailto:martina.casanova@gmx.ch)

---